



續文選卷第一

賦

畋獵

大獵賦 并序

李白

明平原湯紹祖公孟撰



白以為賦者古詩之流辭欲壯麗義歸博達不然何以光贊盛美感天動神而相如子雲競誇辭賦歷代以為文雄莫敢詆訐臣謂語其大略竊或徧其用心于虛所言楚國不過千里夢澤居其大半而齊徒吞

若八九三農及禽獸無息肩之地非諸侯禁淫述職
之義也上林云左蒼梧右西極考其實地周袤纔經
數百長楊誇胡設網爲周陟放麋鹿其中以搏攫充
樂羽獵於靈臺之囿圍經百里而開殿門當時以爲
窮壯極麗迨今觀之何齷齪之甚也但王者以四海
爲家萬姓爲子則天下之山林禽獸豈與衆庶異之
而臣以爲不能以大道匡君示物周博平文論苑之
小竊爲微臣之不取也今聖朝園池遐荒殫窮六合
以孟冬十月大獵於秦亦將曜威講武掃天蕩野豈
淫荒侈靡非三驅之意耶臣白作頌折衷厥美其辭

曰

粵若皇唐之挈天地而襲氣母兮粲五葉之歲蕤惟
開元廓海寓而運斗極兮總六聖之光熙誕金德之
淳精兮漱玉露之華滋文章森乎七曜兮制作參乎
兩儀括衆妙而爲師明無幽而不燭兮澤無遠而不
施慕往昔之三驅兮順生殺於四時若乃嚴冬慘切
寒氣凜冽不周來風玄冥掌雪木脫葉草解節土囊
煙陰火井冰閉是月也天子處乎玄堂之中飡八水
兮休百工考王制兮遵國風樂農人之閑隙兮因校
獵而講戎乃使神兵出於九闕天仗羅於四野徵水

衡與林虞辨土物之衆寡千騎飈掃萬乘雷奔稍扶
桑而拂火雲兮刮月窟而搜塞門赫壯觀於今古業
搖蕩於乾坤此其大略也而內以中華爲天心外以
窮髮爲海口豁咽喉以洞開吞荒裔而盡取大章按
步以來往夸父振策而奔走足跡乎日月之所通囊
括乎陰陽之未有君王於是撞鴻鐘發鑿音出鳳闕
開宸襟駕玉輅之飛龍歷神州之層岑遊五柞兮瞰
三危挾細柳兮過上林攢高牙以總總兮駐華蓋之
森森於是擢倚天之劍彎落月之弓崑崙叱兮可倒
宇宙噫兮增雄河漢爲之却流川嶽爲之生風羽旄

揚兮九天絳獵火燃兮千山紅乃召蚩尤之徒聚長
戟羅廣澤呵雨師走風伯稜威耀乎雷霆烜赫震於
蠻貊陋梁都之體制鄙靈囿之規格而南以衡霍作
襟北以岱恒作陔夾東海而爲壑兮拖西溟而流渠
麾九州之珍禽兮迴千羣以全入聯八荒之奇獸兮
屯萬族而來居雲羅高張天網密布且杲綿原峭格
掩路蠖蠓過而猶礙螭螟飛而不度彼層霄與翳榛
罕翔鳥與伏兔從營合技彌巒被崗虹旗電掣金戈
森行卷長空之飛雪洗晴野之寒霜吳騫走練宛馬
蹀血縈衆山之聯綿隔遠水之明滅使五丁摧峯一

夫拔木下塹高頽深平險谷擺椿枯開林叢噶噶呷
呷盡奔突於場中而田強古冶之儔鳥獲中黃之黨
越崢嶸獵莽蒼喑鳴哮鬪風旋電往脫文豹之皮抵
玄熊之掌批狡手猱挾三挈兩旣徒搏以角力又揮
鋒而爭先行魁號以鶚睨兮氣赫火而敵煙拳封獬
肘巨挺梟羊應叱以斃踣獬兪亡精而墜巔或碎腦
以折脊或歎髓而飛涎窮遐荒蕩林藪扼土狎殪天
狗脫角犀頂探牙象口掃封狐於千里捩雄虺之九
首咋騰蛇而仰吞拖奔兕以却走君王於是峩通天
靡星旂奔雷車揮電鞭觀壯士之効獲顧三軍而欣

然曰夫何神扶鬼慄之駭人也又命建夔鼓勵武卒
雖輻輳之已多猶拗怒而未歇集赤羽兮照日張烏
號兮滿月戎車轆轤以陸離殼騎煌煌而奮發鷹犬
之所騰捷飛走之所蹉蹶攫麇麇之咆哮蹂豺貉以
挂格膏鋒染鏑填巖掩窟觀殊材與逸羣尚揮霍以
出沒別有白貂飛駿窮奇貙獠牙若錯劍鬣如叢竿
口吞及鋌目極槍櫓碎琅弧攫玉弩射猛彘透奔虎
金鏃一發旁疊四五雖鑿齒磨牙而致伉誰謂南山
白額之足覩總八校搜四隅馳專諸走都盧趨喬林
撇絕壁抄獬獠攬貊獠囚馳鼙於峻崖頓毅獲於穹

石養由發箭奇肱飛車巧聒更羸妙兼蒲且墜鷓鴣
於青雲落鴻鴈於紫虛捎鶴鵠漂鷓鴣殫地廬空神
居斬飛鵬於日域摧大鳳於天墟龍伯釣其靈鼈任
公獲其巨魚窮造化之譎詭何神怪之有餘所以噴
血流川飛毛灑雪乍若乎高天雨獸上墜於大荒又
似乎積禽爲山下崩於林穴陽烏沮色於朝日陰兔
喪精於明月思騰裝上獵於太清所恨穹昊之路絕
而忽也莫不海晏天空萬方來同雖秦皇與漢武兮
復何足以爭雄俄而君王茫然改容愀然有失於安
思危防險戒逸斯馳騁以狂發非至理之弘術且夫

人君以端拱爲尊玄妙爲寶暴殄天物是謂不道乃
命去三面之網示六合之仁已殺者皆其犯命未傷
者全其天真雖剪毛而不獻豈割鮮以焯輪解鳳凰
與鸞鷲兮旋騶虞與麒麟獲天寶於陳倉載非熊於
渭濱於是享獵徒封勞苦軒行魚騎酌醕韜兵戈火
網罟然後登九霄之臺宴八紘之圃開日月之扃闢
生靈之戶聖人作而萬物覩覽蒐岐與狩敖何宣城
之足數哂穆王之荒誕歌白雲於西母曷若飽人以
淡泊之味醉時以淳和之觴鼓之以雷霆舞之以陰
陽虞乎神明狃於道德張無外以爲且琢大朴以爲

紉頓天網以掩之獵賢俊以御極若此之狩罔有不
克使天人晏安草木蕃殖六官斥其珠玉百姓樂於
耕織寢鄭衛之聲却靡曼之色天老掌圖風后侍側
是三階砥平而皇猷允塞豈比夫子虛上林長楊羽
獵計麋鹿之多少誇苑囿之大小哉方將延榮光於
後昆軼玄風於邃古擁嘉瑞臻元符登封於泰山篆
德於社晉豈與乎七十二帝同條而共貫哉君王於
是迴蜺旌反鑿輿訪廣成於至道問大隗之幽居使
罔象掇玄珠於赤水天下不知其所如也爲師下疑
落一句

紀行

玄覽賦

梁孝元帝

歲次旃蒙月建司空變凌陰之呂扇廣莫之風蕭子
褰帷九水作牧三宮廼盱衡而言曰惟天爲大惟堯
則之惟地爲厚惟王國之粵我皇之握鏡寔乃神而
乃聖陳六聯於八則弘九職於三令運璇樞而御宇
執玉衡而齊政大矣廣矣無得而稱俯觀鬪於軒義
諒斗筭於子姒包河圖與洛書括龍官乎鳳紀超大
德於百王高鴻名於萬祀惟天縱於副后踰啓誦而
惟首旣掄儒於肅成復斷獄於長壽豈止丕莊屈膝

將令班鄭捧筵譬衢樽而待酌若懸鐘之須扣明踰
繫象之外聲高洙泗之右伊俯已之顓愚謬聯萼於
天衢筮東門而畫堊創南國而分墟詔伯宗以爲儉
詰內史而策書用分茲於茅社從侯服而俾予類金
虎以封建非桐珪以錫虞爾其湘水之東卽我龜蒙
魏甘露而分邑吳太平而定中鎮麟山之崔嵬傷龍
跡其穹窿金城高而相屬石燕起而依風豈連鑣於
分陝美追蹤於二公彼琅臺之作守有彭泗之嘉名
殊金海之分地異魚石之所城經沈子之高墉蓋水
運之堤封謝禮樂之干櫓閱武騎之輶衝軾錦車而

前驚驅魚軒而繼蹤無復鸞歌鳳舞唯對綠柳青松
畱吳宮之宿鸞響平陵之夜鐘飛余轡而西征戍太
真之舊營鳴節鼓之金鐻屯戎車於石城戮滔天之
封豕斬橫海之長鯨每輟書而歎息景樹德之風聲
從王役於鏡中浮文鷁而載鴻經謝亭而帳飲想彥
伯之高風度五城而騁望見三冀之無窮故以飛雲
蒼隼白鱧青桐金吾舍利鳴鶴紫宮眺方嶽乎雲間
望赤坂之珠殷想真長之送別懷思曠之還山此檜
檝而方遠彼松舟而未閑倦旅泊於新丘同渭水之
不流或千人而並唱乍萬人而相鉤毀橋由於瑗度

鑿空資於仲謀睇三茅之靈秘懷九轉之仙記紫臺
石室之文青首銀函之字獨有披霧之心彌軫凌雲
之志捫殷碑之愴望挹延州之高讓并膚沸而蜚螿
勢崎嶇而低昂見傳巴之度曲聞安歌之浩唱想觀
樂乎朝陽憶紆衣乎夕張廻余舫之美風聳余棹乎
雲陽彼桑梓之必敬况枌榆之舊鄉將遊目於五湖
乃浩覽於姑蘇臨閶門之跨水聳重闕而開都睇太
伯之卜祀爰避國於勾吳去西滸之樂政尊東夷之
楷模時渡谷水之陽尚想嘉禾之方壯慶亭於吳后
雄構李於越王觀泉亭之涌波崖巍巍而峩峩張素

蓋而縈州嶼馳白馬而越江施鼓洪濤於萬里曾未
動於織羅及戾止乎東甌登玉筍與銅牛山東武而
遙集鴈南海而飛浮巖亭亭其似蓋氣苕苕其若樓
登舜橋而延首瞰禹井而淹畱御史之牀猶在督護
之門不修雖濫同於僭寇愧民瘼之何求皇覽揆余
之忠誠詔入謁於承明旣攝州於淮海且作尹乎中
京慕張生之謫伏挹邊延之勵精珥金貂而待問鳴
玉佩而趨庭兼三河及三輔總九緯乎九經揚王庭
之俊選聞褒然於前則時濫假於中台掌邦教之觀
國乍南宮而薦士且右鄉而表德判辟雍之樂語辯

金馬之儒墨驅安車以騁望壯天居之麗極詳夫皇
王爰處本無定所堯都平陽舜在冀方玄王居亳成
周卜洛故知黃旗紫蓋域中爲大天地之所合風雨
之所會蔭美氣之葱葱浮卿雲之靄靄聳梁山而成
闕縈長淮而似帶昔者甘泉暉章平樂未央凌霄飛
雨麒麟鳳凰九華仁壽百福明光玉階紫闈雕柱錦
墻木蘭爲棟文杏爲梁溫臺冬燠秋牕夏涼甲乙之
帳庚辛之房亦有祗園之右齊之仁壽用擬舟航長
爲稱首日殿月宮金池珠叢七重迢遞千柱玲瓏虹
橋左跨鴈苑南通紫紺之堂臨水青蓮之臺帶風及

夫皦光未旭更籌曙促猶然陽燧之火尚執驪龍之
燭或帶桃花之綬乍響玄山之玉爰八命而建旗誠
非親而勿居應鳴鞞於龍角覆緹幕於熊車開轅門
於淮渚汎舳皇之容與唵紫駟之長歌奏玄雲之疊
鼓開右座而納文設左廣而招武旣風起而雲飛復
摧斑而拉虎汎樓船而鬱紆憶霸楚之雄圖悲騅馬
之不逝忘逐鹿之長驅豈烏江之天險資赤帝之神
符於是途經灌壘水分當利彼吳王之連和延魏后
之交質趙將軍之建節辛侍中之奉使亮鼎足其何
言限修江而爲二泊九井而問津蓋六服之都會方

函谷之設險譬魯陽之襟帶觀棄繻之裂帛見高車
之輔軼顧濡須之故嶽每當食而忘飯鬪二虎於江
干爭兩龍於修坂旣凱捷而來旋遂鳴鐃而獨返彼
銅山之可傷何驕容之無方已築長洲之苑復寔海
陵之倉遂稱兵而內侮宜朝起而夕亡原西陵以肇
基始衝梯於士治載爲前茅之首寔表勤王之師同
蕙苾之興謗成貝錦之深疑良弓藏而高鳥盡入不
謙而出不辭遊雷中而徜徉遇日吉而辰良祀公瑾
以桂酒薦忠肅以椒漿實討曹之英策蓋謀桓之秘
方衣披披而屢舞神欣欣而樂康吊劉安於下雉聊

載懷於惇史或策杖而龍飛或叱石而羊起將鷄鳴
於天上遂埋冤於蒿里匪仙道之云僞蓋爲仁其由
已經釣臺而高邁過鄂渚而西浮變青門之三襲爲
黃塵之一丘城逶迤而中斷階坡陁而半畱分沙羨
而啓鎮卽開蕃於夏州星尚連於翼軫舍兼分於斗
牛麗滄浪之水清良信美乎濯纓嗟其釣而非釣復
何慮而何營羗有願而不獲拂蘭橈而上征冬已謝
而春辭聊方舟而水嬉看白沙而似雪望却月而成
眉臨石渚其如鏡玩弱柳其猶絲停赤壁而延佇聊
愴望而方思吳水鄉之舟楫魏陸產之臯貌本吳長

而魏短况地利與天時結憤風而炎上燎原火於驚
颺灰霧霏而擊馬箭參差而麗龜成班車之逸氣碎
當途於鹿麋分洞庭於吳土限東益於巴丘如淄澠
之相別似涇渭之分流雖滔滔而直瀉終耿耿而橫
浮想蘭香之薦枕懷娥皇之夜遊若夫子瑜設險之
記閩遨游泳之地既下車而踐境蚤詢求於方志曉
泊鬻拳之津夕瞻荒谷之寺居柳下而布德坐棠陰
而高眎班六條於宰邑賢十部於從事每題輿於仲
舉豈虛名乎叔治藉務隙於登臨乃紛吾之本志時
復設羽蓋揚旌旆乘雕玉從貝帶浮雲起登高唐汎

枉渚望涔陽荆棘生於龍門之下狐兔穴於馬牧之
旁臨章華而流盼見舊楚之淒涼試極目乎千里何
春心之可傷其舊渚宮也夾江帶阡布濩井田通達
交道高門接連人腰水心之劔家給火畊之田既追
隨而得性寔燕處而超然若平臺之中觀閣相通雄
梁渡水壯翼臨空金堤之路銅鞮之宮閣寫陵霄樓
布麗譙橫走馬而爲觀擬牽牛而作橋爾乃樹之榛
栗倚桐梓漆三色黃甘千戶朱橘桃蔭井而成蹊萍
浮江而汎實蟬鳴枝而候稻范飛冠而吐蜜復有水
底石髮山筋地骨書帶新抽屏風牙發反蒐長生靈

壽女貞金鹽玉鼓堯非舜榮交讓之目代謝之名忘
憂長樂枇杷鼓箏竹則篳篥綠荼交戰策皮淚沾虞
后龍還葛陂便娟防露檀欒夾池聊右書而左琴且
繼踵於華陰彼門人之問道各蒙求而有心先鈞槩
於魚魯乃紛定於陶陰識三家之云謬知五門之可
尋時仰稟於皇猷討巴濮於禪條乃稜威於華墨出
車檻之云修觀月窟之入附覩日勒之來遊旣虎牙
而成號又龍額而爲侯仰皇德之洪深款朱離於侏
任見白題之蹋鼓看烏孫之學琴獻桂條之良賚奉
桃枝之恠琛噍聚米於馬援晒畫地於臧旻彼蠢爾

之爲鯁伊馮陵而未靜異黃金於黑山非綠林於青
嶺余喟然以指蹤寔濟寬而持猛負步光之文劒驚
漢陽之夕景麾靈琚之左轉光玳簪而右簪白雲生
而陣合紅塵起而軍暗於是驅驕驕命蹶張廻翠蓋
之金爪臨絳宮之玉堂擬都護之戍已模荆尸之甲
裳作齊軍之減竈教燕師之臥墻觀田峻於虞澤命
車右而前驅猶從戎於細柳若驅馬於長榆矜猿鳴
之抱木傷兔走之依株每愀然而作色方載馳而轉
軾閱放麇而興憫對亂鱗而動惻引高宴於城隅駐
五馬而踟躕乃有青琴碧玉絳樹綠珠西河王豹東

楚綿駒蘭缸夕然合璧斜天照流風之迴雪映出水
之初蓮非吾心之所悅曾未始而流連濫叨榮於分
陝踰一紀之星躔子旣生而冠宇嗟畱滯以迴遭罷
臨邊之瑞節觀楚黎之臥轍向秋野之蒼茫對寒江
之幽咽散歸雲之鬱蒼吐長風之颼颼聞羗遂之哀
怨聽胡笳之悽切慘余袂兮淚成行攀余轅兮不忍
別奉信珪而入朝驅駟馬而乘輅旣總司於戎旅亦
兼飾於豐貂登贊踞而目極忽平原之已超帶方達
之九軌接馳道之三條彼重門之擊柝馮霞起以建
標雜丹樓以藻井間青山於綺縠驟落星之從龍覩

燿火之迢遶鬱如蓬萊之臨滄海憬如崑崙之出絳
霄函夏之所覲江漢之所朝若夫天不愛道地不愛
寶賔連紫達華萃朱草麒麟五色飛兔雙翼集我君
圃之旁遊我帝梧之側於斯時也天子郊禘於圓丘
高玉簡於東漢邁金版於西周奏蒼璧而服大裘樂
有雲翹之舞牲非鬯粟之牛設黃琮而禮地望方澤
乎神州節會咸池之瑄冕無繁露之旒觀三農乎九
穀薦黍稷之種種命甸師而清塵詔封人而出宿敬
青壇而致虞動翠耜而祈穀時季春之上巳臨祓禊
乎沼沚杏花發於露寒棘實浮於濛汜爰長久之御

節採日精於山趾天策夜而動星鉤陳朝而按軌余
是時也陪玉軼飾金羈駕駉駉躍翠罷棄侗儻控權
奇寶劔昭晰綵鞞陸離乍俯馬足時仰月支見靈鳥
之占異觀司南之候離習執鞭而珥筆雖日夕而忘
疲奧重明堂地丙巳乎正陽乃八窓而四達開上圓
而下方置陰鑿之明水設珪瓚而盈觴諄天官乎冢
宰服端委而辯方虔植物之蘊藻鄙將饗之牛羊藉
鴻私而置傳復推轂而懷方沂蛟川於滙澤泐鵠塞
於潯陽何蠡川之浩浩而匡岫之蒼蒼其匡岫也盤
紆峭崿嶷嶙鬱律峻極於天干霄秀出岑嶽崎嶇烏

兔蔽虧哈呀豁開背原面野噴飛流於天末鼓雷霆
於巖下聳高館於雲中聯藁祠於星社雕甍綺閣吁
可畏其欲落雲霧杳冥縈萬嶺而俱青照曜山莊岩
嵒石梁鴈門餘帳隆安故床鏡臨江而分影鑪銜花
而共香若乃羽族徘徊察風應雷鴛鴦感夢乾鵠知
來露華挾雌而嘯侶御環帶壘而含猜孔接影而颺
颺鷗交頸而陪鰓爾其彭蠡際天用長百川沸渭渝
溢瀲澹連延大則浩汗滉漾細則澆灌潺湲遇神飈
之沸爽彼祈報之無憊且搏搖以九萬乍高颺而三
千其中則有澆澗嘉魚鸞羽龍鬚戴星含石蒲身雉

軀乍浮圓鏡時汎明珠報蕩子之長信送仙人之短
書耻觀魚而爲樂解舒鴈於高繳必冀孔愉之龜當
如噲叅之鶴愾衝冠而發憤嗟吾人之施薄觀進退
於我生每篤靖而居貞羞爲金谷之富不矯石閭之
清每鞠躬而遵節藉王道之旣平貴靜者人所便予
得之於自然非三百之不足惜五十於豐年笑汗邪
之行潦喜甘雨於石田飛新梅於倡粉拂輕絮於房
綿月芝抽而曉落燈花開而夜燃菊從風而金散荷
帶水而珠圓已寤歌於折柳復行塗而採蓮課七分
與六日推兩地與參天夕章程而鉤股亦刺注而叅

連幼墳籍以自娛迄方今而不渝雲氣芝英之簡懸
鍼倒薤之書緘乎蒸栗之帙飾乎酸棗之珠擬河獻
之畱眞希淳于之席珍笑彭聃之下士聊重義而自
欣鑿戶牖而長望混木鴈而兼陳嗟今來而古往方
絕筆于獲麟

南征賦

張纘

歲次姬訾月惟中呂余謁帝於承明將述職於南楚
忽中川而反顧懷舊鄉而延佇路漫漫以無端情容
容而莫與乃弭節歎曰人之寓於宇宙也何異夫栖

蝸之爭戰附蝸之遊禽盈虛倚伏俯仰浮沉矜榮華
於尺景總萬慮於寸陰彼忘機於粹日乃聖達之明
箴妙品物於貞觀曾何足而繫心撫余躬之末迹屬
興王之盛世蒙三樂之休寵荷通家之渥惠登石渠
之三閣典校文乎六藝振長纓於承華眷儲皇之上
獻居銜觴而接席出方舟以同濟彼華坊與禁苑常
宵盤而晝憇思德音其在耳若清塵之未逝經二紀
以及茲悲明離之永翳惟平生之福能實有志於棲
息慙滅沒之千里謝韓哀於八極如蓑裘之代用譬
輪轅之曲直愧周任之清規諒無取於陳力逢濯纓

之嘉運遇井汲之明時懷君恩而未答顧靈瑣而依
遲總端揆以居副長庶僚而稱師猶深泉之短綆若
高墉而無基伊吾人之罪薄豈斯滿之能持奉皇命
以奏舉方驅傳於衡疑遵夕宿以言邁戒晨裝而永
辭行搖搖於南逝心眷眷而西悲爾乃橫濟牽牛傍
瞻雉庫前觀隱胍却視雲布追晉氏之啓戎覆中州
之鼎祚鞠三川於茂草霑兩京於朝露故黃旗紫蓋
運在震方金陵之兆允符厥祥及歸命之銜璧爰獻
璽於武王啓中興之英主宣十世而重光觀其內招
人望外攘干紀草創江南締構基址豈徒能布其德

主晉有祀雲漢作詩斯于見美而已哉乃得正朔相承於茲四代多歷年所二百餘載割疆場於華戎拯生靈於宇內不被髮而左袵翳明德其是賚次臨滄之層巘尋叔寶之舊堦蘊珠玉之餘潤昭羅綺之遺妍懷若人之遠理豈喜愠其能遷雖魂埋於百世猶映澈於九泉經法王之梵宇覩因時之或躍從四海之宅心故取亂而誅虐在蒼精之將季翦洪柯以銷落旣觀蝎而逞刑又施獸而爲謔候高燹以巧笑俟長星而懽喙何慄慄之黔首思假命其無託信人欲而天從爰物睹而聖作我皇帝膺籙受圖聰明神武

乘豐而運席卷三楚師克在和仁義必取形猶積決應若飈舉於是殪桑林之封豨繳青丘之大風戢干戈以耀德肆時夏而成功放流聲於鄭衛屏豔質於傾宮醜軒皇以邁迹豈商周之比隆化致升平於茲四紀六夷膜拜八蠻同軌教穆於上庠寃申於大理顯三光之照燭降五靈之休祉諒殊功於百王固無得而稱矣泝金牛之迅渚覩靈山之雄壯實江南之丘墟于雲霄而竦狀標素嶺乎青壁葺頽文於翠嶂跳巨石以驚湍批衝巖而駭浪嶮千尋之峭岬深萬流之大壑隱日月以蔽虧搏風煙而回薄崖映川而

晃朗水騰光而倏爍積霜霰之往還鼓波濤於前却
下流沫以游險上岑峯而將落聞知命之是虞故違
風而靡託訊會骸之詭狀云怒特之來奔及漁人之
垂餌沈潛鎖於洪源鑿幽塗於忠武馳四馬之高軒
不語神以徵怪情存之而勿論曬姑熟之舊朔訪遺
迹今宣武挾仲謀之雄氣朝委表而作輔歷祖宗之
明君猶負芒於盛主勢傾河以覆岱威回天而震宇
雖明允之篤誠在伊稷而未舉矧有功而無志豈季
葉其能處懼貽笑於文景憂象賢之覆餗雖苞蘖以
代興終夷宗而殄族彼儋石之羸儲尚邀之而俟福

况神明之大寶乃闇于於天祿造扁鍵之候司發傳
書於關尉據輶轅乎伊洛守衡津於河渭無矯且以
招賓闕捐縵而待貴實祇敬於王典懷鞠躬而屏氣
惟函谷之襟帶疑武庫之精兵采風謠於往昔聞乳
虎於甯成在當今而簡易止譏鑿其姦情陋文仲之
廢職鄙彤門之食征於是近睇赭岑遙瞻鵲岍島嶼
蒼茫風雲蕭散屬時雨之新晴觀百川之浩漭水泓
澄以闇夕山參差而辨旦忽臨睨於故鄉眇江天其
無畔遡洄流而右阻遵長薄而左貫獨向風以舒情
攀芳洲其誰翫息銅山而繫纜訪叔文之靈宇得舊

名而猶存皆攢蕪而積楚想夫君之令問實有聲于
前古拯巴漢之廢業爰配名於鄒魯辨山精以息訟
對祠星而寤主每撫事以懷人非末學其能睹嘉梅
根之孝女尚乘肥於媵姬嗟吳人之重辟憂峻網於
將貽彼沈瓜而顯義指滄波而爲期此浮履以明節
赴丹爛其何疑信理感而情悼實悽悵於余悲空沈
吟以遐想愧邯鄲之妙詞望南陵以寓目美牙門之
守志當晉師之席卷豈藩籬而不庇攜老弱於窮城
猶區區乎一簣雖挈甕之小善寔君子之所識闕一
是謂事人之禮入雷池之長浦想恭岱之芳塵臨魚

官以輟膳踐寒蒲之抽筠又有生爲令德沒爲明神
或捐家事主攜手拜親或正身殉義哀感市人所以
家稱純孝國號能臣揚清徽於上列並異世而爲隣
發曉渚而遡風苦神吳之難習岸權舟而不進水騰
沙以驚急天曠曠其垂陰雨霏霏而來集愍征夫之
勞瘁每舉帷而佇立由江沱之派別望彭匯之通津
塗未中乎及絳日已盈於浹旬於是千流共歸萬嶺
分狀倒景懸高浮天瀉壯清江洗滌平湖夷暢翻光
轉彩出沒搖漾岷山嶓冢悠遠寂寥青溢赤岸控汐
引潮望歸雲之蒼蒼揚清風之飄飄界飛流於翠薄

耿長虹於青霄若夫灌莽川涯層潭水府游泳之所
往還喧鳴之所攢聚羣飛沙漲掩薄草渚奇甲異鱗
雕文粹羽聽寡鶴之偏鳴聞孤鴻之慕侶在客行而
多思獨傷蒐而悽楚美中流之衝要因習坎以守固
旣因之而設險又居之而務德南通珠崖夜郎西欵
玉津華墨莫不內清姦宄外弭苛慝籬屏京師事有
均於齊德也眇匡嶺以躊躇想霞裳於雲仞流如娥
之逸響發王子之清韻若夜光而可投豈榮華之難
擯美還丹其何術佇一丸於來信徑遵途乎鄂渚迹
孫氏之霸基陳利兵而蓄粟抗十倍之銳師在賢才

之必用寧推誠而忍欺圖富強以法立屬貞臣而日
嬉識徐基於江畔云釣臺之舊址方戰國之多虞猶
從容而宴喜欽輔吳之忠諒歎仲謀之虛已處君臣
而並得良致霸其有以伊文侯之雅望誠一代之偉
人襴觀書以心服玉比德而譽均邁時雄之應運方
協義以經綸名旣逼而愈賞言雖間而彌親惜勤王
於延獻俾漢京之惟新何天命其弗與悲盛業之未
申汎蘆洲以延佇聞伍員之所濟出懷珠而免讎歸
投金以答惠彼無求於萬鍾惟長歌而鼓柹慨斯誠
之未感乃沈軀以明誓空負恨其何追徒臨食而先

祭及旋師於鄭國美邀福於來裔入郢都而抵掌壯
天險之難窺允分荆之勝略成百代之良規賈生方
於指大應侯譬之木披所以居宗振末強本弱枝聞
古今之通制歷盛衰而不移可不謂然與美經國之
遠體也酌忠言於城郢播終古之芳猷忘我躬之匪
閱顧社稷而懷憂服莊王之高義乃徵名於夏州耻
蹊田之過罰納申叔之嘉謀觀巫臣之獻箴鑒周書
以明喻何自謀其多僻要桑中而遠赴若葆申之誅
丹實匡君以成務在兩臣而優劣居二主其並裕臨
赤崖而慷慨推雄圖於魏武乘戰勝以長驅志吞吳

而并楚總八州之毅卒期姑蘇而振旅時有便乎建
旣事無畱於蕭斧霸孫赫其霆奮杖邁俗之英輔裂
宇宙而三分誠決機乎一舉嗟玄德之矯矯思興復
於舊京招臥龍於當世配管仲而稱英收散亡之餘
弱結與國而連橫延五紀乎岷漢紹四百於炎精望
巴丘以遭回遵洞庭而惝怳沈輕舟而不繫何靈胥
之浩蕩眺君福之雙峰徒臨風以增想償瑤觴而一
酌駕彩蜺而獨往爾乃南奠衡霍北距沮漳包括沅
澧汲引瀟湘漉漉長邁漫漫回翔蕩雲沃日吐霞含
光青碧潭嶼萬頃澄澈綺蘭從風素沙被雪雜雲霞

續文選 卷一 四十一 希貴堂
以舒卷間河洲而斷絕回曉仄於中川起長飈而半
滅稅遺構之舊浦瞻汨羅以隕泗豈懷寶而迷邦猶
殷勤而一致蘊芳華以襞積非黨人之所媚合小雅
之怨辭兼國風之美志譬彈冠而振衣猶自別於泥
滓且殺身以成義寧露才而揚已悲先生之不辰逢
椒蘭之妬美有驂騶而不馭焉皇皇於千里旣踐境
以思人彌流連其無已修行潦之薄薦敢憑誠於沼
沚謁黃陵而展敬奠瑤席乎川湄具蘭香以膏沐懷
椒糝而要之延帝子於三后降夔龍於九疑騰河靈
之水駕下太乙之靈旗撫安歌以會舞疎緩節而依

遲日徘徊以將暮情眇然而無辭愠秦皇之川幸尤
土壤以加戮昧天道之無親勤望祀以祈福將人怨
而神怒故飛川而蕩谷推冥理以歸讐遂刊山而赭
木於是下車入部班條理務砥課庸薄夕惕兢懼存
問長老隱恤氓庶奉宣皇恩寬徭省賦遠哉盛乎斯
邦之舊也有虞巡方以託終夏后開圖而疏決太伯
讓嗣以來遊漢臣祈仙而齊潔固是明王之塵軌聖
賢之蹤轍也若夫屈平懷沙之賦賈子遊湘之篇史
遷摛文以投吊楊雄反騷而沈川其風謠雅什又是
詞人之所流連也亦有仲寧咸德仍世相繼父子三

台緇衣改救古初抱於烈火劉先高而忤世蔣公琰
之弘通桓伯緒之匡濟鄧充時之紀述谷思恭之藻
麗寔川嶽之精靈常間出而無替也至於殊庭之客
帝鄉之賢神奔鬼化吐吸雲煙玉笥登之而却老金
人植杖以尊泉蘇生騎龍而出入處靜駕鹿以周旋
配北燭之神女偶南榮之偓佺時髣髴其遙見亦往
往而有焉爾乃歷省府庭周行街術山川遠覽邑居
近悉割黔中以置守獻青陽而背質鄒生所謂還舟
楚王於焉乘驛巡高山之累仞褒吳文之爲宰彼非
劉而八王皆國士而身醢在長沙而著令經五葉其

未改知天道之福謙勝一時之經始尋太傅之故宅
今築室以安禪邑無改於舊井尚開流而列泉懷伊
管之政術遇庸臣而見遷終被知於時王嗟漢宗之
得賢受齊君之遠託豈理謝而生全哀懷王之不秀
遂抱恨而傷年修定祀於北郭對林野而幽藹庶無
吐於馨香祀瓊茅而沃醑景十三以啓國惟君王其
能大迨炎正之中微寔斯藩而是賴顧四阜之紆餘
乍升高以遊目審山川之面帶將取名於衡麓下彌
漫以爽塏上嶽虧而重複風瑟瑟以鳴松水琤琤而
響谷低四照於若華竦千尋於建木冀翬塵之可屏

登巖阿而寤宿捨域中之常戀慕遊仙之靈族是時
涼風暮節萬實西成華池迥遠飛閣淒明嘉南洲之
炎德愛蘭蕙之秋榮下名甘於曲榭採芳菊於高城
樹羅軒而並列竹被嶺而叢生翫棲禽之夕返送旅
鴈之晨征悲去鄉而遠客寄覽物而娛情惟傳車之
所驚寔鷹揚其是掌或解組以立威乍露服而加賞
遵聖主之恩刑荷天地之厚德沾河潤於九里澤自
家而刑國闕小道之可觀寧畏途其易克矐高衢而
願騁憂取累於長纆聞困石之非據承烟戒乎明則
愧壽陵之餘子學邯鄲而匍匐也

東征賦

高適

歲在甲申秋窮季月高子遊梁復久方適楚以超忽
望君門之悠哉微先容以効拙姑不隱而不仕宜漂
淪而播越出東苑而遂行沿濁河而茲始感隋皇之
敗德劃平原而爲此西馳洛汭東金淮浹地豁山開
川流波委六官景從千官遷迤龍舟錦帆照耀乎數
千里大駕將去羣盜日起尸位者卷舌而偷生直諫
者解頤而後歿寄腹心於梟獍任手足於蛇虺旣受
殺於匹夫尚興疑於愛子豈不爲窮力役於征戰務

淫逸於奢侈六軍悲牧野之師萬姓哭遼陽之鬼嗟
顛覆於曩日指年代於流水唯見長亭之煙火悲曠
野之荆杞至鄴縣之舊邑懷蕭相之高風旣屈節於
主吏每歸誠於沛公始俱起於天下乃從定於關中
推金帛於他人挹圖籍於我躬按山川之險阻救天
地於屯蒙嘉盈俸以增邑方指蹤而建功納邵平以
防患舉曹參而告終經經城而永望想譙郡而銷憂
慨魏武之雄圖終大濟以橫流用兵戈以威四海挾
天子而令諸侯乃擅命以誅伏徒矯跡以安劉吾始
未知夫逆順胡寧比於殷周下符離之西偏臨彭城

之高岍連山鬱而漭蕩分大澤乎渺漫憶昔天未厭
禍項氏叛渙解齊歸楚自蕭擊漢天地無色風雲潰
亂憫君王之坎軻混士卒以奔散苟炎運之克昌豈
人生之塗炭次靈壁之逆旅面垓下之遺墟嗟魯公
之慷慨聞楚聲之悒於歌拔山以涕洟竊霸圖而莫
居捐亞父之何甚悲虞姬之有餘出重圍而狼狽至
陰陵以躊躇顧天亡以自負雖身歿今焉如登夏丘
而寓目對蒲隧而愁予聞取慮之斯在徵長直而舍
諸宿徐縣之迴津惟偃王之舊域方以小而事大豈
無位而有德彼皆昏暴以喪邦伊何仁義而亡國高

延陵之挂劍慕班彪之述職泗沛水之悠悠俯婁林
之紆直卽日河澗依然泗上山川土田耳目清曠眺
睢源之呀豁倚楚關之雄壯挂輕席於中流順長風
以破浪過盱眙之邑屋傷義帝之波蕩雖三戶之亡
秦知萬人以離項越龜山而訪泊入漁浦而待潮鴻
鴈飛兮木葉下楚歌悲兮雨瀟瀟霜封野樹冰凍寒
苗斫草無色蘆花自飄幸息肩於人事願投跡於漁
樵思魏闕而天遠向秦川而路遙候鳴雞以進帆趨
亂流以爭迅縱孤舟於浩大撫垂堂以誠慎遵枉渚
於淮陰徵昔賢於韓信哀王孫以寄食嘉漂母之無

愠鄙亭長之不仁乃晨炊而嗇恠忽從龍以獲騁遂
擒豹以自奮破全趙有奇謀稱假齊以益振幸辭通
以感惠俄結豨而謀釁當處約而心亨曷持盈而不
順陵赤斨之迢遞棹白波之紆餘歷山陽之村野投
襄賁之邑居人多耆艾俗喜觀漁連葭葦於郊甸雜
汀洲於里閭感百川之朝宗彌結念於歸歟日杲杲
以麗天雲飄飄以卷舒曾放情而蹈海丘永歎於乘
桴遇坎則止吾今不知其所如

遠遊賦

并序

袁表

余弱冠登朝讀書中秘繼官刑曹調武選武庫災編
戍湖州赦歸蒙薦起爲南武選遷職方署員外郎尋
有廣西之命昔孔子欲居九夷不以爲陋廣西古百
粵也今海內同軌且余旣仕矣安敢以遠辭乎爰作
遠遊賦以述事抒情焉其辭曰

沐鴻私於嘉運兮擢遺仄於樊丘曳華綬以登進兮
踐舊京而嬉遊幸朝野之無事兮肆驩虞而靡憂謝
文墨之填委兮稽圖牒以諮搜差穀旦以休息兮爰
嘯侶以集儔升北山以遐眺兮遡大江而榜舟或閱
武於廣場兮或袂袂於清流尋廢興於六代兮仰駿

業於皇猷念無荒之有戒兮信佚樂而不偷乏佐
時之奇略兮竟投裔於僻阨駭顏駟之麗眉兮恠馮
唐之白首嘆滯淹於更生兮笑浮沈之楊叟嗟子安
之巧宦兮蒙良史之譏醜偉潘仁之拙政兮賦閒居
而不朽衆捷徑以窘步兮固余顏之所厚獨修姱以
委順兮諒余心之所取苟貪婪以競進兮寧坎壈以
自守昔孔聖之周流兮居九夷而弗陋下惠之直道
兮遭三黜而無咎顧樗櫟之非材兮雖棄捐其何有
奉簡書以畏忌兮戒僕夫而啓行出橈李之下邑兮
游臨安之故城痛越霸旣不終兮宋社又以圯崩肅

陽侯以先驅兮遵淝水以揚舲感錢鏐之雄武兮提
尺劔以縱橫悼伍胥之忠憤兮浮鷗夷以隕身忽怒
濤之山立兮儼白馬以耀靈沿桐江以容與兮憇巖
瀨之澄清躡高臺以長嘯兮懷哲人之典刑於是芳
歲將徂玄冬告畢雨蒙蒙其下淫兮雪霏霏以蕭瑟
靈霧曠以冥冥兮同雲曖其無色鴈噉噉而南翔兮
日忽忽其西匿坐修夜之難旦兮步列星以太息繹
甯越之曩歌兮材士頽頽而失職心侘傺以紆軫兮
思絀結而沓惑水泉涸其不流兮石巉巖而阻塞旣
儻侗以川浮兮復崎嶇而山陟野蕭條而無人兮獸

躑躅以屏跡愁車殆而馬煩兮汨吾朝征而夕于役
形枯槁以渴饑兮精銷鑠而內蝕菟涸養以踰佚兮
涕浪浪而霑臆撫壯年之不居兮耻修名之未立於
是歷甌粵觀豫章艸嶸閣於江渚兮詠瑋辭以徬徨
帝子不可作兮王生亦已淪亡睇彭蠡之巨浸兮追
鴻伐於 高皇想湖水之盡赤兮殪元兇於大黃翦
鯨鯢於溟渤兮陋巨鹿與昆陽謁羣忠於叢祠兮覩
丹青之耿光甄孫許之壯烈兮實後先以相望咸致
命以竭節兮終身滅以名揚越臨江以信宿兮矚玉
笥之崇岡修降禪於漢武兮欽登封之闕藏忽獻歲

以發春兮迴青陽於幽谷鳥嚶鳴其相和兮麗冬榮
之嘉木悲去鄉其日遠兮時反顧以蜷局魏牟皇皇
以戀闕兮嗣宗塗窮而慟哭何賢哲之達觀兮猶委
心於榮辱諷龍蛇之至言兮勵浮雲以自勗聳韓廟
於袁疆兮哀逢辰之不淑黜百家以述聖兮排二氏
以箴俗雖馴鱷以開雲兮卒罹殃而粵逐乎楚纍於
江潭兮披騷經而三復椒蘭妬而構讒兮嫉蛾眉而
謠詠怨靈修之不化兮傷郢都之傾覆式彭咸以自
靖兮葬汨羅之魚腹涉長沙以夙駕兮嗟賈生之天
年遭漢文之殊遇兮何卒困乎絳灌之巧言闢宣室

以徒召兮賦鵬鳥而自憐挺異才以命世兮竟賈志
於重泉亂衡陽之洪河兮厲沅湘之大川覽吳楚之
上游兮極耳目之偉觀瞻柳侯於永郊兮薦繁蔭以
羞筵世溷濁而壅塞兮紛姑忌以救賢慨四子之一
轍兮羗異代而同患士不遇以永歎兮諒自古而已
然望朱垠以倣裝兮指象郡而驤軌肆流目於南疑
兮悵重華之野歿蒼梧曼曼以在望兮悼二妃於江
之汜山巖從以造天兮嵐昏昏而晝起桂樹叢生於
巖阿兮春炎炎其若暑壤濱海以沮洳兮土墊濕而
恒雨猥狃狻以伺人兮咸雕題而黑齒蝮蛇綦綦於

中林兮或含沙於淵水雄虺九首以鬻鬻兮封狐捷
而千里何此邦之炎瘴兮固蠻族之所止徵禹跡之
所不到兮檢職方而未序詫漢帝之喜功兮肇開拓
而疆理猗皇風之泰昌兮界昆吾以爲宇包五嶺以
作藩兮括百粵以置吏朝越裳以重譯兮撫交州而
卽敘眇余躬之陋微兮敷文教於茲隅戾泮宮以振
鐸兮選青衿之秀儒懼聖遠而言湮兮病曲學之支
離列四科以作人兮愧五教之未施憑丘墳以願志
兮寄絃歌以自娛聞老聃之適戎兮講道德之玄虛
蒙莊遁於漆園兮馳放言以恣睢虞卿窮而亾聊兮

猶發憤以著書苟斯文之未來兮竊希志於前規吾
將籠今古以騁驚兮掇罔象之玄珠亂曰去鄉遠遊
心不樂兮自冬徂春將焉薄兮炎州卑濕風土惡兮
魑魅晝出瘴癘作兮狐歿晉丘不忘故兮代馬北風
尚知慕兮世不我知羗誰愬兮歸歟歸歟娛竹素兮

續文選卷第一

三十一 希貴堂

續文選卷第一 終



